

## **Nassuiaatit nalinginnaasut.**

### *1. Peqqussutissat siunnersuummut tunuliaqut*

Inuiaqatigiit aqqissugaanerat pillugu iliuusissatut Naalakkersuisut pilersaarumminni nunatta ungasinnerusoq isigalugu aningaasaqarnikkut nammineernerulernissaa siunniuppaat. Anguniakkatut nalunaarsorneqarsimasut naammassiumallugit Naalakkersuisut inuiaqatigiit aqqissugaanerannut naalackersuinikkut suliniutit arlallit aallartissimavaat taakkunanilu qitiulluinnarpoq suliffeqarfiit Namminersornerullutik Oqartussanit pigineqartut immikkut toqqakkat namminersortunit tiguneqarnissaat/namminersortunut pigisassanngortinneqarnissaat.

Peqqussutissat siunnersuutikkut matumuuna Naalakkersuisut inuiaqatigiit aqqissugaanerat pillugu iliuusissatut pilersaarutimik ilaa piviusunngortinniirpaat. Peqqussutissat siunnersuutip kingunerissavaa Naalakkersuisut immikkut qanoq iliuuseqarnissaminnut pisinnaatitaalissasut tamatumani ilanngullugu ingerlatseqatigiiffinni ingerlatseqatigiiffissuup KNI-p aquataani aktianik tunisaqarsinnaanissaq.

### *2. Aalajangersakkat atuuttut*

KNI A/S pillugu Inatsisartut peqqussutaatigut nr. 4-kkut, 6. juni 1997-imeersukkut KNI A/S pilersinneqarpoq pilersinneqarnermini 500 mio. kr.-inik aktiatigut aningaasaateqarluni, taakkualu Namminersornerullutik Oqartussat agguarlugit tunniuppaat KNI Pilersuisoq A/S-imut KNI Pisiffik A/S-imullu aktialiusasut. KNI A/S-ip ingerlatseqatigiiffissuarmi ingerlatseqatigiiffittut aqutsisutut pilersinneqarnerata saniatigut pilersitsinermut peqqussummi aalajangerneqarpoq Kalaallit Allakkeriviat umiarsuaatileqarfillu KNI Pilersuisoq A/S-imiit immikkoortinneqassasut amerlasuukkaarlugit pisisarneq nioqutissanillu tuniniaasarneq sammineqarnerulersikkumallugit.

KNI Pilersuisoq A/S-ip KNI Pisiffiullu ingerlatseqatigiiffittut namminersortutut tamarmik immikkut ingerlataraat nunaqarfinni/isorliunerusuni illoqarfinnilu niuernerq. Nunaqarfinni pisiniarfiit sunik nioqutissaqarnissaq qanorlu akeqartitsinissaq eqqarsaatigalugit akilersinnaasumik ingerlanneqarsinnaanngimmata peqqussummi aalajangerneqarpoq KNI Pilersuisoq A/S Namminersornerullutillu Oqartussat aallartiffittut niuernermi piumasaasut tunngavigalugit sullissinissamik isumaqatigiissuteqassasut. Taamaalilluni pequssummi ersarissumik inissinneqarpoq inuiaqatigiit suliassiissutaat niuernikkut iluanaarniutaasinnaanngitsut qanoq inissinneqassanersut, taamaalillunilu nunatta karsiata ingerlatseqatigiiffiillu aningaasaqarnerat ersarissumik immikkoortilluinnarneqarput eqqarsaatigalugit aningaasat pillugit inatsimmi aningaasaliissutit atorneqartarnerannut piumasaasut aammalu aktiaateqarluni ingerlatseqatigiiffiit ukiumullu naatsorsuusiortussaaneq pillugu inatsimmi aalajangersakkat.

Peqqussummut tunngatillugu oqaaseqaatini tamanut tunngasuni peqqussummut patsisaarpiartut imatut oqaasertalerneqarput:

*"peqqussutissatut siunnersuutit saniatigut inatsisitigut tunngavissat tassaassasut ingerlatseqatigiiffiit pillugit inatsisini maleruagassat nalinginnaasut.*

*Namminersornerullutik Oqartussat aktiaatilittut sunniuteqarsinnaassasut aamma Naalakkersuisut aqqutigalugit ataatsimeersuarnertigut.*

*Aktiaateqarluni ingerlatseqatigiiffiit tunngaviatigut inuttut inatsisit tunngavigalugit namminersorlutik inuussutissarsiortutut pissuseqassasut aamma namminersornerullutik oqartussat suliffeqarfiutaannik ingerlatseqatigiiffittut ingerlatsinikkut anguniakkat tunngaviatigut niuerneramik ingerlatsinermik tunngaveqarneq atorlugu pitsaanerpaamik anguneqarsinnaanissaat.*

*Ingerlatseqatigiiffiit annertuumik aqqissuussaaniikkut aningaasaqarnikkullu nammineersinnaassuseqartitaassasut.*

*Aqutsineq, allaffissornikkut aqutsineq ingerlatsinerlu eqqarsaatigalugit ingerlatseqatigiiffiit arlaannaannulluunniit atanatik inissisimanagerat isumannaarneqassasoq ingerlatseqatigiiffiit aningaasaataasa aamma namminersornerullutik oqartussat aningaasaataasa toqqaannartumik toqqaannangitsumilluunniit akulerussuunneqarnissaat pinaveersaartinniarlugu.*

*Ingerlatseqatigiiffiit pisortanik sullissinermi suliassanik naammassinninniarnernannut atatillugu sullissinerup qaffasissusia aamma nukissanik atuineq eqqarsaatigalugit namminersornerullutik oqartussat akisussaaffii aalajangiisinnaanermullu piginnaatitaaffii erseqqissarniarlugit."*

Ullumikkut KNI Pisiffik suliffeqarfiuvoq nutaaliaasoq, ingerlanneqarluartooq sinneqartooruteqartartorlu niuernerme ingerlatat 45%-iinik tiggummissaqartoq. Ilaatigut allanngortiterinerit, pisiniariaatsit pitsanngorsarnerisa ingerlatseqatigiiffissuullu aqunneqarnerata nukittorsarnerisa kingunerisaannik angusat allanngorsimapput 1995-imi 37,5 mio. koruuninik amigartoornermiit 1999-imi 31,1 mio. koruuninik sinneqartoornermut. Tamatuma peqatigissaanik suliffeqarfik pisiniarfitsigut annertuumik pitsanngorsaasimavoq sulisullu piginnaanngorsarluarsimallugit, naatsorsuutigineqarporlu taamatut ineriartortitsineq ukiuni aggersuni ingerlaannassasoq.

Pisiffik A/S ingerlatseqatigiiffissuarmi KNI-mi ingerlatseqatigiiffiummat aquataq tamakkiisumik pigineqartoq ingerlatseqatigiiffiup tamakkiisumik ilaannakortumilluunniit namminersortunut pigisassanngortinneqarnera pisinnaavoq aktiaatit ilaannaasaluunniit aningaasaliisunut namminersortunut tunineqarneratigut. Inatsisit malillugit tunisaqarnissaq pisussaassaaq KNI A/S-ip ingerlatseqatigiiffimmi aqutamini Pisiffik A/S-imi aktianik tunisaqarneratigut tunisaqarneq sioqqullugu Naalakkersuisut aalajangeereerneratigut, tassami Naalakkersuisut KNI A/S Pisiffik A/S-imut ingerlatseqatigiiffittut aqutsisutut inissisimasooq sinnerlugu ataatsimeersuarnermi aalajangiisartuummata.

Taamaattumik peqqussutissatut siunnersuut manna ilusilersorneqarsimavoq Naalakkersuisut pisinnaatillugit ingerlatseqatigiiffissuup KNI-p ilai inuiaqatigiinniit isigalugit tunissallugit piukkunnartut tuninissaannut. Peqqussutissatut siunnersuummi pisisinnaasumik isumaqatigiinniarnermi Naalakkersuisut pisinnaatitaapput, tamatumani ilanngullugu pisinnaatitaallutik tunisinissap naapertuutilersutut isigineqalinnginnerani ingerlatseqatigiiffissuarmi KNI-mi aaqqissugaanikkut allanngortiterinissamut.

### *3. Pisiffiup namminersortunut pigisassanngortinneqarnissaanik anguniakkat eqqarsaatigalugit Naalakkersuisut ataatsimut isigalugu isumaliutaat*

Pisiffiup namminersortunut pigisassanngortinneqarnissaanik siunnersuut tassaavoq Naalakkersuisut namminersorluni inuutissarsiummik ingerlatsinerup naammassisaqarfiunerusumik pitsanngorsarnissaanun unammillersinnaanissaanullu suliniutaasa ilagisaat. Tamatumani siunertaavoq ingerlatseqatigiiffiup niuertutut ingerlatsineq tunngavigalugu ingerlanneqarnissaa aammalu suliffeqarfittut namminersortutut allatuulli tunngaveqarluni ingerlanneqarnissaa. Niuernermi nalinginnaasumik atugassarititaasut tunngavigalugit ingerlatsinerup nukittorsarneqarneratigut suliffeqarfinnullu namminersortunut allanut unammillernerup annertusarneqarneratigut ingerlatseqatigiiffiup aaqqissugaanera uummarissarneqarsinnaavoq eqaannerusunngorlugu angusaqarusunnerulersillugulu suliffeqarfiup pisisartui eqqarsaatiginerullugit. Namminersortunut pigisassanngortitsinikkut ingerlatseqatigiiffiup naalakkersuinikkut toqqaannartumik sunniutigineqarfigineqarnera annikillisarneqassaaq piivinneqarsinnaallunuunniit pisortallu tunisaqarnerminni annikitsuunngitsumik isertitaqassapput.

Tamatuma saniatigut tunngaviusumik isigalugu namminersortunut pigisassanngortitsinerit suliffeqarfinnut naalakkersuinikkut patsiseqartumik pisortanit pigineqartuartariaqartunut iluaqutaasussaapput, tassami pisortat periarfissaqarnerulissammata suliffeqarfiit tamakkua inuiaqatigiit sinnerlugit suliassaasa naammassinissaannut.

Inuiaqatigiinni nutaaliaasuni pisortat namminersortulluunniit suut suliarissaneraat nalunaarsortariaqarpoq aallaavigalugit inuiaqatigiit atugarissaarnissaata naalakkersuinikkut inuiaallu aningaasaqarnerata tungaaniit qanoq isigineqarnerat, inuiaqatigiit aningaasaqarnerata isumannaatsup napasinnaasullu pitsaanerpaanik ungasinnerusumut tunngavissaqarnissaa pillugu angorusutat, kiisalu inuutissarsiornikkut ataatsimut ineriartorneq eqqarsaatigalugu aningaasaleerusuttut aningaasaliissutissallu kajuminnarnissaat anguniarlugu naalakkersuinikkut kissaataasut.

Namminersortut pisortallu ingerlataasa killilersorneqavinniarnerni tunngavigineqarajuttarsimavoq pisortat ingerlataat suliffeqarfinnut namminersortunut niuernerq tunngavigalugu unammillertuunersut. Pissutsit taamaakkaangata tunngavilersoruminaattarpoq sooq pisortat ingerlatami pineqartumi peqataassanersut, imaassimangippat ingerlatseqatigiiffiup suliassai inuiaqatigiinnik sullissinissanut pingaaruteqarluinnartunut tunngasuusut.

Pisortat ingerlataat namminersortunut unammillertuuppata aningaasatigut kajumissuseq inuiaqatigiinnilu sillimmatit agguanneqarnerat equinneqarsinnaavoq, tamatumunngalu patsisaasinnaapput suliat akilersinnaanngitsut tigumiaannarneqarnerat imaluunniit suliffeqarfiup naapertuutinngitsumik ilusilersugaanera. Tamakkulu ungasinnerusoq isigalugu inuiaqatigiinni aningaasaqarnerup ineriartorneranut killilersuisuususaapput.

#### *4. Tuniaanermi periusissaq*

Naalackersuisut malinniarpaat tunisaqartarnermi periuseq namminersortunut pigisassanngortitsisarneq pillugu anguniakkanut ikorfartuutaanerpaasoq aammalu tamanna tunngavigalugu Namminersornerullutik Oqartussanut iluanaarutaasinnaanerpaasoq. Taamaattumik Naalackersuisut pingaartilluinnarpaat tunisaqarneq suliffeqarfimmut pisisartunullu iluaqutaassasoq qaninnerusoq ungasinnerusorlu isigalugit aqutugalugit sullinneqarluarnerulerneq, akit annikinnerusut, pisiassat pitsaanagerusut pisiassallu amerlanerusut.

#### *5. Pisiffiup ingerlatsinermini tunngavigisaani naleqqussaanerit*

Naalackersuisut Kalaallit Nunaanni siunissami unammilleqatigiinnissaq eqqumaffigilluinnarpaat. Taamaattumik Naalackersuisut tunisaqartoqannginnerani aalajangertarniarpaat Pisiffiup niuernikkut tunngavigisai naleqqussartariaqarnerusut unammilleqatigiissinnaaneq atuisartunut inuiaqatigiinnullu tamanut iluaqutaajuartussaqq attatiinnarumallugu Pisiffiup namminersortutut kisermaassisuulerpallaalersinnaanera killilersorumallugu.

Naleqqussaanermi pingaarnerutinniarnaqartut tassaapput illoqarfinni sisamani 2000-it inorlugit inulinni pisiniarfiit Pisiffimmut atajunnaarsinneqassasut suliffeqarfiup namminersortunut pigisassanngortinneqannginnerani. Tassani pineqarput illoqarfiit uku: Qasiqannguit, Paamiut, Narsaq Nanortalillu. Aammattaaq tupanut tunngatillugu immikkut isumaqatigiissut atorunnaarsinniarnearpoq, taamaalilluni Pisiffik tamatumuunakkut immikkut salliutitaajunnaarsillugu. Kiisalu naatsorsuutigineqarpoq Pisiffik sulisut inissaannik pisortat pigisaannik pisartagaqarunnaassasoq.

Pilersuisup niuernikkut tunngaviata annertusineqarnerata kingunerissavaa ingerlatseqatigiiffiup ingerlataasa assigiinngitsut takulertoruminarnerulerat, aammalu Unammilleqatigiinnermut ataatsimiititamit aamma/imaluunniit ingerlatseqatigiiffiup kukkunersuisuinit nakkutigineqalernerat.

#### *6. Pisortanut aningaasatigut, allaffissornikkut inatsisiliornikkullu kingunerisassat*

Pisiffiup aktiaataanik tunisineq qanoq iluanaarutaatigissanersoq suli nalilerneqarsinnaanngilaq. Tamatumani ilaatigut apeqqutaavoq paasilluarnerussallugu ingerlatseqatigiiffiup ilai sorliit pisiariumaneqarnerussanersut. Pisiffik A/S-ip tunineqarnerani iluanaarutinit apeqqutaassaartaaq suliat qanoq amerlatigisut suullu KNI Pilersuisoq A/S-imut nuunniarneqarnerusut. Tamatuma saniatigut tunisaqariaaseq ingerlatseqatigiiffiup niuernikkut periaatsitigullu

periarfissaanut taamalu ingerlatseqatigiiffiup qanoq naleqarneranut sunniutilerujussuussapput.

Naatsorsuutigineqarpoq unammilleqatigiinnermut ataatsimiititaq nukittorsarneqassasoq Pisiffiup suliffeqarfiillu unammillertaasa sulinerannut tunngavissat ineriartornerlu naapertorlugu naleqqussarnissaat nakkutigilluarsinnaajumallugu. Unammilleqatigiinnermut ataatsimiititaq ingerlalluortoq pitsaasorlu unammilleqatigiivinnissamut pingaaruteqartorujussuussaaq ulluinnarnilu pisiassat tungaasigut ataatsimoorluni kisermaassilersinnaanermut illuatungiliuttuussalluni aqqissuusseriaaseq namminersortunulluunniit pigisassanngortitseriaaseq sunaluunniit toqqarneqaraluarpata.

Siuliini taaneqareersutut Inuiaqatigiit aqqissugaanerat pillugu iliuusissatut pilersaarummi naatsorsuutigineqarpoq inuutissarsiutinik ingerlatsineq namminersortunut tunniunneqariartuaassasoq. Tamatumunnga tunngatillugu Naalakkersuisut inuutissarsiorneq pillugu inatsisit nutaanngorsarnissaat aammalu imigassat nioqqutigineqarnerat sassaalliutigineqartarnerallu pillugu inatsit qulaajartillugit aallartissimavaat. Siunnersuutip matuma saqqummiunneranut atatillugu Naalakkersuisut taamaallaat siunnersuutiginiarallarpaat inuutissarsiornermut inatsimmi aamma imigassanik nioqquteqarnermut sassaallertarnermullu inatsimmi allannguutissat killeqartut KNI Pisiffik A/S-ip namminersortunut pigisassanngortinneqarnissaanut aporfiusinnaasunut tunngasut. Tassalu siunniunneqarpoq nunatsinni ingerlatseqatigiiffinni nutaamik pisortanngortoqarluniluunniit siulersuisuni ilaasortanngortoqarsinnaalissasoq inuutissarsiummik ingerlatsisinnaaneq akornusernagu.

Imaassinnaavoq ukiuni arlalinni ikaarsaariarnermi pisariaqarsinnaasoq Pisiffik namminersortunit pigineqalersimasoq Pilersuisorlu qarasaasiatigut paasissutissatigut ataatsimoorlutik ingerlatsisariaqassasut. Tele Greenland A/S oqarasuaatit tungaasigut kisermaassisuugami tamatumunnga akuersisussanngorsinnaassaaq. Akuersineq tamanna Naalakkersuisunit akuerineqartussaassaaq.

#### *7. Inuussutissarsiornermut aningaasatigut allaffissornikkullu kingunerisassat.*

Peqqussutissatut siunnersuut inuutissarsiutinik ingerlatsisunut allaffissornikkut kinguneqartussaannngilaq. Ilimagineqassaarli peqqussutissamut siunnersuutikkut pisiniarfinni niuernerme amerlasuunngorlugillu pisisarnermi unammilleqatigiinnermi atugassarititat naligiissarneqassasut, tassami ilaatigut Pisiffiup sulisunut inissarsisarnera aningaasanillu pissarsisarnera suliffiit namminersortut allat atugarisaannut assigiilersinneqassammat. Sisamat tikillugit illoqarfinni pisiniarfinnik Pisiffimmiit Pilersuisumut nuussineq kiisalu tupamit nioqqutissianik quersuarniit tuniniaasarnerup allanngortinniarneqarnera eqqarsaataasoq pinngitsooratik Pilersuisumi ingerlatsinerme aningaasaqarniarnermut nukittorsaataassapput.

#### *8. Innuttaasunut allaffissornikkut kingunerisassat.*

Siunnersuut allaffitsigut aqutsinikkut innuttaasunut sunniuteqassanngilaq.

## 9. Inatsisissamik piareersaaneq.

Kattuffiit attorneqartut peqataatinneqarsimapput ilaatigut Naalakkersuisut namminersortunut pigisassanngortitsinissaq pillugu Nuummi isumasioqatigiissitsineranni peqataanermikkut. Tamatuma saniatigut illoqarfinni attorneqartuni paasisitsiniaasoqarlunilu oqallitsitsisoqarsimavoq. Tamakkua saniatigut peqqussutissatut siunnersuut kattuffinnut attugaasunut nassiunneqarsimavoq.

Peqqussutissatut siunnersuut pisortaqarfinnut tamanut Naalakkersuisuilu Allattoqarfiannut tusarniaassutigineqarsimavoq.

### **Aalajangersakkanut ataasiakkaanut nassuiaatit**

#### § 1.

Nr. 1-imut.

Nassuiaatini nalinginnaasuni takuneqarsinnaasutut Naalakkersuisut aallaqqaatigalugu siunniuppaat Pisiffik A/S-ip niuernikkut tunngaviisa naleqqussareerneratigut Pisiffik A/S-ip aktiaataasa tuniniarnissaat. KNI A/S pilersinneqarpoq Inatsisartut peqqussutaat nr. 4 6. juni 1997-imeersoq malillugu. Peqqussut malillugu taanna ingerlatseqatigiiffissuarmut peqqussummi suliffeqarfissuarmut nalunaarneqartumi § 1, *imm.* 4-mi aalajangersakkamut tunngasuvoq, tassani KNI Pisiffik A/S peqqussut malillugu KNI Pisiffik A/S suliffeqarfissuup KNI A/S-ip ingerlatseqatigiiffinnut aqutaanut peqqussut malillugu ilaalluni. KNI A/S-ip pilersitaanerata saniatigut peqqussummi sammineqarput aktiaateqarluni ingerlatseqatigiiffiit Namminersornerullutik Oqartussanit pigineqartut. Peqqussutip tunngaviusumik imarai illuatungaartigut ingerlatseqatigiiffiup pisortai ingerlatseqatigiiffiit pillugit inatsisit iluanni nammineersinnaassasut illuatungaartigulli pisortanut tunngatillugu inatsisitigut aqunneqassasut. Aktiaateqarluni ingerlatseqatigiiffittut Namminersornerullutik Oqartussanit pigineqartutut inatsisitigut pisortanit aqunneqarnerup qulakkiissavaa ingerlatseqatigiiffissuup pilersinneqarnerani mianerisassat ingerlatseqatigiiffiup sulinermini malissagai. Tassalu Naalakkersuisut pisinnaatitaapput ingerlatseqatigiiffiit ungasinnerusoq isigalugu anguniagassaat aalajangissallugit, tamatumalu kingornatigut siulersuisut niuernermi tunngavissat tunngavigalugit iliorsinnaapput naalakkersuinikkut killissarititaasut iluanni.

Peqqussutissatut siunnersuummi § 1 nr. 1-imi aalajangersakkami aqutsisutut ingerlatseqatigiiffiuneq atorneqarpoq aktiaateqarluni ingerlatseqatigiiffiit pillugit inatsimmi § 2-mi aalajangerneqartutuut, tassa qaqugu aktiaateqarluni ingerlatseqatigiiffik Namminersornerullutik Oqartussanit pigineqartuunersoq taamalu peqqussummut ilaanersoq. Allatut oqaatigalugu peqqussutip atornissaanut pingaarnerpaaq tassaavoq Namminersornerullutik Oqartussat ingerlatseqatigiiffiup aqutsisup ingerlatseqatigiiffinnut aqutaminut allequttaminut

sunniuteqarsinnaaneratulli sunniuteqarsinnaassasut, aktiaateqarluni ingerlatseqatigiiffiit pillugit inatsit malillugu tamanna tassaavoq aalajangiisinnaaneq.

Aktiaateqarluni ingerlatseqatigiiffiit pillugit inatsimmi § 2, imm. 1-imi aamma 2-mi aalajangersagaq inatsimmik nalunaarummi nr. 545-mi 20. juli 1996-imeersumi imatut oqaasertaqarpoq:

*" § 2. Ingerlatseqatigiiffik aqutsisoq ingerlatseqatigiiffiit aqutat peqatigalugit ingerlatseqatigiiffissuuvoq.*

*Imm. 2. Aktiaateqarluni ingerlatseqatigiiffik ingerlatseqatigiiffiuvoq aqutsisoq:*

- 1) aktiaateqarluni piginneqataassuteqarluniluunniit ingerlatseqatigiiffimmi taasisinnaatitaanerit amerlanerussuteqartut pigigunigit,*
- 2) ingerlatseqatigiiffimmi aktiaateqaruni piginneqataassuteqaruniluunniit tamatumunngalu peqatigitillugu ingerlatseqatigiiffiup siulersuisuini imaluunniit, piginneqataassuteqarluni ingerlatseqatigiiffik siulersuisoqanngippat, pisortaaneqarfiani ilaasortanik amerlanerussuteqartunik toqqaalluniluunniit soraarsitsisinnaatitaaguni,*
- 3) ingerlatseqatigiiffimmi aktiaateqaruni piginneqataassuteqaruniluunniit tamatumunngalu peqatigitillugu malittarisassat tunngavigalugit isumaqatigiissuteqarsimalluniluunniit ingerlatseqatigiiffimmut aalajangiisuusumik sunniuteqarsinnaatitaagaanni,*
- 4) ingerlatseqatigiiffimmi aktiaateqaruni piginneqataassuteqaruniluunniit tamatumunngalu peqatigitillugu aktiaatillit piginneqataassutilliluunniit allat isumaqatigiissuteqarfigineri tunngavigalugit taasisinnaatitaanerit amerlanerussuteqartut pigigunigit imaluunniit*
- 5) ingerlatseqatigiiffimmi aktiaateqaruni piginneqataassuteqaruniluunniit tassanilu aalajangiisuusumik sunniuteqarluni."*

Namminersornerullutik Oqartussat assersuutigalugu ingerlatseqatigiiffimmi KNI-p aqutaasa arlaanni amerlanerussutinik tunisaqarnermikkut aalajangiisuujunnaarpata aalajangersakkatut siunnersuut malillugu peqqussut ingerlatseqatigiiffimmut pineqartumut atorunnaassaaq. Tassalu § 1 nr. 1-imi aalajangersakkatut siunnersuutikkut anguniagaavoq peqqussutip atuussinnaaffia Namminersornerullutik Oqartussat ingerlataannit peerneqassasoq immikkut inatsisiliunngikkaluarluni. Taamaattorli KNI-mi ingerlatseqatigiiffiit taamatut peqqussummut atajunnaarsinnaanerit ingerlatseqatigiiffinnut aqutanut taamaallaat atuuppoq. KNI A/S ingerlatseqatigiiffittut aqutsisutut tunineqassappat atorunnaarsinneqassappalluunniit pisariaqartuassaaq immikkut pisinnaatitsinissaq taamalu Inatsisartut isummeqqinnissaat. Tamatuma kingunerissavaa peqqussummi aalajangersakkat ingerlatseqatigiiffissuup KNI-p sinneranut atuuttuassammata tamatumani aallarniutitut ingerlatseqatigiiffik aqutaq Pilersuisoq A/S ilaalluni.

Nr. 2-mut.

Peqqussutissamut nassuiaatini tamanut tunngasuni oqaatigineqartut Naalakkersuisut siunniuppaat Pisiffik A/S-imi ingerlatat immikkut toqqakkat immikkoortinneqassasut Pisiffik A/S-imi aktiat tuniniarneqalinnginneranni.

Peqqussummi § 1 imm. 5 naapertorlugu Naalakkersuisut pisinnaatitaapput aktiaateqarluni ingerlatseqatigiiffiit pillugit inatsit malillugu ataatsimeersuartutuut malittarisassanik allangortitsisinnaallutik ingerlatseqatigiiffissuarmi KNI-mi ingerlatseqatigiiffinni aktiatigut pigisat qaffallugit ikilillugilluunniit. Taamaalilluni § 1 imm. 5-imi aalajangersagaq atuuttoq periarfissiivoq ingerlatseqatigiiffiit aktiaataasa naleqqussarnissaannut soorlu aktiaatit ikillugit Pisiffik A/S-ip suliaasa naatsorsuutigineqartutut immikkoortinneqarnerata kingunerisaanik.

KNI A/S-imi siulersuisut peqqussummi § 2 malillugu nalinginnaasumik pisinnaatitaapput aktiaateqarluni ingerlatseqatigiiffiit pillugit inatsit malillugu ingerlatseqatigiiffissuup suliaasa naleqqussarnissaannut niuernermit pissutsit naapertorlugit. Tassalu siulersuisut pisinnaatitaapput suliat ingerlatseqatigiiffiit akornanni nuutsittarnissaannut ingerlatseqatigiiffinnuunniit aqutanut nutaanut tunniunnissaannut iliuutsit kingunerissanngippassuk ingerlatseqatigiiffimmi aqutsisumi atit siunertalluunniit allangortinneqarnerat. Naleqqussaanerit pisinnaassapput tunisinikkut, kattunnikkut, avissinikkut, pigisanik ilasinikkut, aningaasaatinik appartitsinikkut il.il.

Avissaartitsinermit periaaseq atoriaannaq tassaassaaq ingerlatat immikkoortinneqalersut Pilersuisoq A/S-imit tiguneqarnerat, taamaalilluni nioqqutissat uninngasuutit pigisallu nalillit naatsorsuutitut tunngatillugu KNI Pisiffik A/S-ip naatsorsuutaaniit peerlugit. Siuliini taaneqartutut allangortiterineqareerpat Pisiffik A/S-imit aktiat tunineqannginneranni KNI A/S-imi ataatsimeersuarnermit ingerlatseqatigiiffinni aqutani marlunni aningaasatigut pigisat aalajangiiffigineqartariaqassapput naleqqussarneqarlutillu.

Nr. 1-imi aalajangersagaq malillugu Naalakkersuisut pisinnaatitaapput ingerlatseqatigiiffissuup KNI-p sinnerata aaqqissugaanikkut ineriartorteqinnissaanut tamatumani ilanngullugu ingerlatseqatigiiffiit aqutat peqataaffigisallu KNI A/S-imit allequtaasut ingerlataasa tamakkiisumik ilaannakortumilluunniit namminersortunut pigisassanngortinnissaannut.

Peqqussutit matuma akuerineqarneratigut inatsisitigut tunngavissaqalissaaq ingerlatseqatigiiffissuup KNI-p naleqqussarnissaanut Pisiffik A/S-imit suliat immikkoortinneratigut Pisiffik A/S-ip aktiaataasa namminersortunut pigisassanngorlugit neqeroortigineqarnissaat sioqqullugu alloriarnertut siullertut. Aaqqissugaanikkut ilusilersugaanikkullu allannguutissat pisariaqartut piviusunngortinneqarnissaat pillugit eqqarsaatit piareersaatillu KNI pillugu peqqussutit atuuttup iluani aallartinneqareerput.

Namminersortunut pigisassanngortitsinissami siunertaammat ingerlatseqatigiiffinni KNI-p aqutaani aktiat/ingerlatat tunineqarnissaat § 3 a-mi aalajangersakkami nutaami Naalakkersuisut ersarissumik pisinnaatitaaffilerneqarput. § 3 a imm. 2 naapertorlugu piginnaatitsissummi pineqarpoq ingerlatseqatigiiffinni aqutani tamakkiisumik ilaannakortumilluunniit aktianik tunisinissaq, taamaalillunilu inatsisitigut tunngavissinneqareerpoq pisiumasinnaasut isumaqatiginiarnerata qanoq inerneqarumaarsinnaanera.



§ 2-mut

Inatsisartut peqqussutaat 1. juni 2001 atortuulerpoq.